

HIBRU

O kiun vëh to nō non po Jiu' varih to vaman ne e Ieesu' Kristo. A ëhnan o to pee, nee to poka' ne o Hibru. Ivëh, ka se popoka' no raoe a napan va Hibru, pa ö na se keh vavato suk no raoe. Ivëhkëk, manih po kiun pamëh na to hikta nat no pa te' to kiun voh.

A napan va po vaman varih Hibru to iu hah voh e ne pa ö hinhin moaan vavoh pee, suk e'e to tataum voh ne a ma punis manih pa ma vakihat pe Ieesu'. Ivëh, ke tōkiun po kiun vëh to vavaasis non na raoe pan, e' to vih non, pee se koe a ö hinhin moaan vavoh pee. Ka manih pe Ieesu' varoe kuru, nee se tavus o te' totoopin manih pa matan e Sosoenën. E Ieesu' rakah e Koa' apuh pe Sosoenën. Ivëhkëk, manih po ankerö', me a ma te' vanënën soe pe Sosoenën, me e Mosës, ee to hikta te' apuh tiroë' ne. Me e' to vavaasis non raoe pan, a napan hikta antoen ne a tavus o te' totoopin manih pa matan e Sosoenën, manih pa ma taate' vapenpen, ke', manih pa ma vu taate' va pa ësës a ma he'. Manih pe Ieesu' varoe kuru, ne Sosoenën se hiuk a ma hat pea. Suk e' to va'aus a ra, pa ö ne' to tavus vamanih pa te' ësës he', pare' te' tamooan non manih pa papmatö pe Sosoenën, E' to vih non, pea se këh a ma taate' moaan pea, ko vaho' ovoes rakah o vaman pea manih pe Ieesu'.

A ma kiun varih to tataki va ne manih pan,
E Sosoenën to vateera' koe voh ea manih pe koa'
pe', 1:1-4

A tasun pe Kristo to apuh oah e non pa tasun pa
ma ankerö' pe Sosoenën, 1:5-14; 2:1-18

A tasun pe Kristo to apuh oah e non pa tasun pe
Mosës, pen Josua', 3:1-19; 4:1-13

A tasun pe Kristo to apuh oah e non pa tasun po
te' ësës he', 4:14-16; 5:1-14; 6:1-20; 7:1-28

Manih pe Ieesu', o vatompoan voon to apuh oah
e non po vatompoan vamoan, 8:1-13; 9:1-28

O era' pe Kristo to kiki oah e non po era' po
vöna', o era' pamëh se hiuk rakah en pa ma hat
pea, 10:1-39

Manih po vaman varoe ne ea se tavus o te'
totoopin pa matan e Sosoenën, 11:1-40

Manih pa taate' te' vaes pea, ea se vaman no e
Kristo, ko pënton no eah. 12:1-29; 13:1-19

A soe ataaton pe tökiun po kiun vëh, 13:20-25.

A Soe Pe Sosoenën To Koe Ma' Pe Koa' Pe'

¹ Moan voh ne Sosoenën to vavaato koe me voh
non a kë sipuura manih po te' vanënën soe. Pa ma
poen peo ne' to vavataare koe voh non ea pa taate'
tata me a taate' vaato.

² Ivëhkëk, manih pa ma poen to oah ee, e' to
vavaato koe me a rora pe Sunai'eah. E Sosoenën
to vaneah voh e Sunai'eah a ma tah kurus. Ee pon
to te' va'peh ne, pare soe, ko oeh me akis tavus me
a ma moeh tah kurus to te' hop ne nën.

³ E Koa' to matan va e non manih pe Tamaneah,
pare' vapeapen non o maaka pe'. O kiki pa soe
pe' to vatoe me non pe Tamaneah, pare öt ne pon a
ma moeh tah kurus pa soe kiki pamëh. Vasuksuk
ne' to mët, ko era' pe' pupui a ra ko vahik a ma hat

pea, ka voon rakah ee. Manuh pa vöön va kin, ne' to iho' non pa papmatö pe Tamaneah a Kikis Vi.

⁴ A tasun pe Ieesu' to apuh oah e non pa tasun po ankerö'. E Sosenen to he' voh poan o ehnan to apuh oah e non pa ma ehneere.

A Tasun Pe Koa' To Apuh Oah E Non Pa Tasun Po Ankerö'

⁵ Ivëh, ke Sosenen hikta soe ke voh ta pah ankerö' a soe ne' to he' e Ieesu' to soe non pan, “Kuru, eën e Koa' peö', keö' e Tamömah.” *Sng 2:7*

Ahik to pöh poen ne Sosenen to soe ke ro ankerö', ivëhkëk, e' to soe ke Ieesu' pan,

“Eö' se te' no' e Tamömah, kën te' nom e Koa' peö'.”

2 Sml 7:14

⁶ Ivëhkëk, o poen ne' se vanö hah ma' a pah Koa' ro pe' manih po oeh, pare' soe pan,

“A ma ankerö' pe Sosenen se vasunön eah.” *Sng*

97:7

⁷ Ke Sosenen to sosoe suk voh non o ankerö', pare' soe pan,

“Eö' to nok voh raoe, kee te' ne a nap kiu peö', pare te' va ne manih pa tuvuh me o tëkrea.”

Sng 104:4

⁸ Ivëhkëk, manih pe Koa', ne Sosenen to soe pan,

“Sosenen, a ma tamooan rakah nen se te' nom a te' Sunön,

parën matop nom a ma napan pën pa taate' totoopin.

⁹ Eën to iu nom a taate' vih totoopin,

parën rës nom a taate' hat.

Ivëh, ke Sosenen e Topoan pën to kon voh oah, ko he' oah o vaeö, me a tasun to te' oah e non pa

ö ne' to he' vavoh a ma vakamö' pën.” *Sng 45:6-7*

¹⁰ Ke Sosenën sosoe suk voh non e Ieesu', pare' soe pan,

“Eën e Sunön, po vamomoaan eën to nok o oeh me akis pa koreomah.

¹¹ O oeh me a akis se hat vamanih po rara vamoaan, pare hik ee.

Ivëhkëk, eën to te' tamooan e nom.

¹² Eën se nikun raoe vamanih po rara, parën panih raoe pon vamanih pa te' to panih o rara,

ivëhkëk, eën se vatoe tamooan e nom,

parën hikta se manot nom.” *Sng 102:25-27*

¹³ E Sosenën to hikta soe ke voh ta ankerö' a soe ne' to he' voh e Ieesu', to soe non pan,

“Tho' manih pa papmatö peö',

ke' antoen pa ö nö' se vaho' a te' to vakihat me a nom oah manih paan in eën.” *Sng 110:1*

¹⁴ O ankerö' to kiu ne paan e Sosenën, ke' vavanö non raoe pa va'aus o te' varih ne' se kon hah.

2

E Sosenën to Kon Hah A Ra

¹ Ivëh, ka se pënton vavih rakah a soe man vëh na to pënton, suk ea toma' këkëh amamot nö hah e no pa soe man, ko këh e Koa' pe Sosenën.

² A soe man vëh no ankerö' to he', e' o Vavaasis pe Mosës. Ketherëh to pënton varo a soe pamëh, ee se kon kamis ee. A kamis pamëh, e' to te' totoopin e non.

³ Ivëh, ke ea me se keh pënton varo ee pa soe apean pe Ieesu' se kon hah a ra, ea hikta onöt no

a rusin këh a kiiki pe Ieesu'. E Ieesu' koman to soe voh ken pea, pa ö se' kon hah a ra. Ko te' varih to pënton voh ne poë to soe pan, a soe va'ih to te' man e non. Ea me to pënton a soe vëh to soe non pan, e Ieesu' se kon koe hah a ra pa ma vaasis po te' varih.

⁴ E Sosenën to vataare me en pan, a soe pamëh to man pa ö ne' to he' a napan a ma vu vëknöm me o kiki apuh. Manih pa ma napan ne' to nok a ma vu tah vatoksean. E' to he' vakëkëh raoe a ma he' pa Tuvuh Vasio' pa ö ne' to iu va non.

E Ieesu' to Kon Hah A Ra

⁵ Ivëh, ke Sosenën to hikta vate' voh o ankerö', pan ee se matop ne a pop pa napan. A pop pamëh na to vavahutët suk no.

⁶ Suk manih po Puk Vapenpen pe Sosenën, e' to sosoe suk non e Sosenën pa ö ne' to kiun va non pan,

“Suk ataeah, ka napan te' oah ne manih po koko-man pën,

kën matop nom raoe?

⁷ Eën to vöknah raoe,

kee te' ne paan o ankerö',

ivëhkëk, eën to vasunön hah raoe,

parën he' raoe a tasun me o kiki.

⁸ A tasun va pa matop a ma tah.”

Sng 8:4-6

Ka soe pamëh to soe non pan. E Sosenën to nok voh o te' se matop ne a ma tah kurus manih po oeh. Ivëhkëk, kuru na to hikta ep no o te' to matop ne a ma tah poë varih.

⁹ Ivëhkëk, ea to ep voh ee pe Ieesu'! E' to vöknah voh ea ko kunah ma' manih po oeh, pare' mët. Manih po poen pamëh, e' to vapaan ke non o ankerö'. Manih po ururuan pe Sosenën, e' to kon Kamis ko

mèt suk voh a napan kurus, pare' kon en po ëhnan apuh.

¹⁰ E Sosenën, e' a Te' to nok voh a ma tah kurus, me e' to matop non a ma tah kurus poë varih. E' to iu non a ma napan peo se nö manuh pa vöön va kin. Ivëh, ke' vate' en pe Ieesu' se kon koe hah a ma napan kurus, pa ö ne' to kon kamis voh. E' to tavus voh a te' totoopin pa ö ne' to vatet voh a taate' pamëh.

¹¹ E Ieesu' to vavoon hah a ma napan, ke'e', me a ma napan varih to voon hah, ee to te' nee a pah tamëëre. Ivëh, ke Ieesu' hikta te' poet voh non, a poka' raoe a kën kea pe'.

¹² Ivëh, ke' soe pan,
“Sosenën, eö' se vavaato suk no' a oah manih pa ma kea peö'.

Eö' se soe vavaeö ka oah manih pa ma vakum.”

Sng 22:22

¹³ E' to soe pet en pan,
“Eö' se vaho' hah ö' pa koren e Sosenën,” *Ais 8:17*
pare' soe hahah kov en pan,
“Eö' ivëh to te' me no' po koa' ne Sosenën to he' a neo'.”

Ais 8:18

¹⁴ O te' poë varih, to te' me ne o sionin. Ivëh, ke Ieesu' tavus va en manih pee. E' to tavus te', ko mèt pare' sun hah. A tah pamëh to vöknah o kikis va pa mèt ne susun po ora' hat to te' me voh non.

¹⁵ E Ieesu' to tavus te', pare' mèt ko sun hah ko voen hah raoe. Ee to nanaöp ne a taate' mèt. Ivëh, kee te' va e ne manih po te' kikiu akuk.

¹⁶ E' to maaka rakah en, pa ö ne' to hikta nö voh ma' pa va'aus o ankerö', ivëhkëk, e' to nö ma' pa va'aus o pus koa' pe Abraham.

¹⁷ Ke Ieesu' tavus va en manih pa ma kea pe' varih, a napan. Ivëh, ke' tavus en a Te' Susun po Te' Ēsēs He' to te' me non o ururuan, pare' vavatet non a soe pe Sosenēn. Ko nonok non a kiu pe'. Ke Sosenēn se ihan anoe a ma hat pa ma napan.

¹⁸ E Ieesu' koman to kon kamis voh, pa ö ne susun po ora' hat to pupunö' voh non poan. Ivëh, ke' se va'aus en po te' varih, ne susun po ora' hat to pupunö' non rae.

3

A Tasun Pe Ieesu' to Apuh Oah E Non Pa Te' Tasun Pe Mosēs

¹ Ivëh, kēn kea vivihan peö', e Sosenēn to vate' a neöm a ma te' koman pe', ke eöm se nö manuh pa vöön pe' vöh kin. Eöm se vavatet nem e Ieesu' vëh ne Sosenēn to va nö ma', ke' te' non a Te' Susun po Te' Ēsēs He' vëh, na to vaman no ko kē no a ëhnaneah.

² E Ieesu' to vavatet vavih rakah e non po iu pe Sosenēn, vamanih pa ö ne Mosēs to nonok vavoh non. E Mosēs to nonok voh non a ma tah ne Sosenēn to iu non, pare' matop non a napan va Israël.

³ A te' to eok a iuun to kon o ëhnan apuh, to apuh oah e non pa iuun ne' to eok. E' to vatoe e non pe Ieesu' to kon voh pa tasun to apuh oah e non pa te' tasun pe Mosēs.

⁴ A ma iuun kurus to te' ne, a te' to eok. Ivëhkëk, e Sosenēn to nok voh a ma moeh tah kurus.

⁵ E Mosēs to vavatet voh non o iu pe Sosenēn. Pare' vanēnēn non a ma tah ne Sosenēn to sosoe non, se tavus amot. Pare' nonok non a kiu manih pa iuun pe Sosenēn.

⁶ Ivëhkëk, e Kristo, e' e Koa' pe Sosoenën. E' to te' me non a kiu va pa matop a napan, ka napan to te' va ne manih pa iuun pe Sosoenën. Ea se te' no a napan pe', pa ö na se keh ötöön vakis no o vaman pea manih pe Ieesu', ko anoeh no eah, ke' öök po poen na se mët.

⁷ Ivëh, ka Tuvuh Vasio' soe pan,
 “Po poen nöm to pënton a soe pe Sosoenën,
⁸ paröm nat nem te' va nem manih po te' vatösoe,
 vamanih pa ö nöm to pënton varo vavoh nem
 e Sosoenën,
 vamanih pa ma sipuineöm to te' voh ne pa
 moeh upin, ko pupunö' a ne neo'.”

⁹ E Sosoenën to soe koe manih pa Tuvuh Vasio' pan,
 “A kën sipuineöm to pupunö' voh a ne neo'.
 Ivëhpëhkëk, ee to ep voh e ne pa ma tah nö' to
 nonok no' po 40 kirismas.

¹⁰ E' a pusun in a tah, nö' to heve suk voh no' raeo,
 suk a ma kokoman pee to te' ke voh e ne.
 Kee vatösoe e ne pa ma soe peö'.

¹¹ Eö' to vovoh parö' soepip vakis rakah eo' pee pan,
 ‘Eöm se nat nem nö pa vanot manih pa muhin
 va Keenan vëh, nö' se he' a neöm.’” *Sng*
95:7-11

¹² Kën kea peö', eöm se matop nem po kokoman hat peöm. Eöm to vanun o vaman peöm, paröm këh ke e Ieesu', e Sosoenën to'to' tamooan.

¹³ Eö' to hikta iu no' ta paeh va peöm se vatösoe non, ka taate' hat vanun a neöm, köm taum a punis. Ivëhkëk, a ma poen kurus nöm se te' nem,

eöm se vava'aus hah a nem pa vaman a soe pe Sosoenën.

¹⁴ O poen na to taneo vaman e leesu' ko vatet eah, para vaman no eah, e' se va'aus en pea. Ivëh, ka se keh vaman vakis avoe' rakah e no pe', ea se vatös me eah pa ma tah koman pe', po poen ne' se hah ma'.

¹⁵ Iva'ih a tah no Puk Vapenpen to soe suk voh non,

“Kuru eöm se tēnan a soe pe Sosoenën,

paröm koe a vatösoe vamanih pa ö no a kēn sipuineöm to pēnton varo vavoh ne e Sosoenën.”

Sng 95:7-8

¹⁶ A napan varih ne Mosës to me tavus kēh voh ma' rae a muhin va Isip, to he' tonun voh e Sosoenën, pa ö nee to pēnton varo a soe pe'.

¹⁷ A napan poë varih ne Sosoenën to heve voh non rae po 40 kirismas. E' to heve voh non o te' varih to nonok hat voh ne, pare mētmēt ee manih pa koman a moeh upin.

¹⁸ Ke Sosoenën soe vakis hah va en manih pan, “Ee voh ivarih a napan to pēnton varo voh a soe peö'. Ee hikta se tavus ne manih po oeh vëh, nö' se he' rae, kee kon a vanot.”

¹⁹ Ivëh, ka nat ee pee to hikta vaman vakis voh ne e Sosoenën, to tavus manuh pa ö ne' se he' rae, kee kon a vanot.

4

¹ E Sosoenën to soe vaman voh ken pea, pa ö na se ho ee pa vöön va pa vanot. Ivëh, ke ea se matop rakah no ko naöp no e Sosoenën tome' kiiki a ra, pa ö na to vatösoe no ko hikta tavus manuh pa vöön va pa vanot.

² Ea to pënton voh ee pa soe vih vamanih pa ö no a napan va Israël to pënton vavoh. Ivëhkëk, ee to pënton varo, pare hikta vaman voh ne ko hikta ho manuh pa vöön va pa vanot. Ka soe vih pamëh hikta va'aus voh raoe.

³ Ivëh, ke ea varih a napan to pënton para vaman no e Sosoenën, ea varoe to se ho manuh pa vöön vavanot va'peh me e Sosoenën. Suk ataeah, e Sosoenën to soe suk voh o te' to pënton varo, pare' soe pan,

“Eö' to heve voh parö' soepip raoe, ko soe pan,
 ‘Ee se nat ne nö pa vanot manih pa muhin va Keenan, vëh
 nö' se he' raoe.’ ”

Sng 95:11

E Sosoenën to soe voh a soe pamëh, e' he vamatop vahik a vöön vanot pe' po poen ne' to nok o oeh, ke' öök non kuru.

⁴ Ivëh, ka manih komön o Puk Vapenpen to kiun va non manih pan,

“Po tönim me o pöh poen ne' to nok a ma moeh tah,
 pare' vavuriah en komön o tönim me o pöök poen.

E Sosoenën to nok vahik en pa ma moeh tah,
 pare' vavuriah en po poen pamëh.”

Jen 2:2

⁵ E Sosoenën to vavaato avoe' suk e non pa pah soe, ko soe pan,

“Ee se nat ne nö pa vanot manih pa muhin va Keenan, vëh
 nö' se he' raoe.’ ”

Sng 95:11

⁶ A napan varih to pënton voh ee pa soe vih, pare hikta ho voh pa vöön va pa vanot, ee to hikta ho voh, suk ee to hikta vaman ne a tah ne Sosoenën to soe voh ke raoe. A nap tëtënan soe ne Sosoenën se vaonöt raoe, kee ho ee pa te' va'peh me poë.

⁷ Ivëhkëk, e' to vate' en po meoh poen vëh na se nō ko vanot. Moaan voh manih pa ö ne' to vavaato koe no ma' pa rivon e Devit, ke' kiun koman o Puk Vaëhëh pan,

“Eën se keh pënton a rivon e Sosenën kuru,
koe a pënton varo.”

Sng 95:7-8

⁸ Ivëh, ka nat e no e Josua' se keh me ho voh en pa napan pa vöön va pa vanot, e Sosenën hikta se vavaato amot suk hah non to meoh poen vanot.

⁹ Ivëh, ka nat e no po meoh vanot pa napan pe Sosenën to te' avoe' e non. E' to te' va non manih pa ö ne' to vanot vavoh pa ö ne' to nok vahik o oeh manih komön o tönim me o pöök poen.

¹⁰ A te' to vanot en pa ö ne' to mët, e' to te' va non manih pe' to vahik en pa kiu pe'. A vanot pamëh to te' va non manih pa ö ne Sosenën to vahik voh a kiu pe', ko vanot en.

¹¹ Ivëh, kuru ne ea se kiu vakis pa ho manih pa vöön va pa vanot va'peh me Sosenën. Ea se koe a pënton vamanih pa ö nee to pënton varo vavoh, pare hikta ho voh pa vöön va pa vanot.

¹² A soe pe Sosenën to kikis vi, pare' to'to'. E' to kakakni oah e non po rapis rë kakakni vapon. A soe pamëh se ruk rakah en po kokoman, me o iu, me o hahara' pea, vamanih po rapis rë. E' to vateera' rakah en pa ma taate' pea.

¹³ Ahik rakah ta pah tah manih po oeh se vakooan in e Sosenën. A pop pea manih po oeh ne Sosenën to nat vavih e non pe', ivëh, ka se vamaaka a ma tah na to nok voh manih pe'.

E Ieesu' E Susun Po Te' Ësës He'

¹⁴ Ivëh, ka se ötöön vakis o vaman pea manih pe Ieesu', pe e' e Susun po Te' Ĕsës He' to nö voh manuh pa vöön va kin. Ke' te' non e Koa' pe Sosenën ko te' vatët tamoaan non pa havineah.

¹⁵ A Te' Susun po Te' Ĕsës He' pea e Ieesu', e' to inan e non pa ma punö' to tatavus a rora, ka hikta onöt no vöknah a ma punö' poë varih. Ivëh, ke' se va'aus en pea, suk a ma taate' punö' poë varih to tavus voh ee manih pe'. Ivëhkëk, e' to hikta nok rakah voh ta pah hat.

¹⁶ Ivëh, ka se koe a naöp pa ö na to nö vatët manuh pe Sosenën vëh to ururuan a rora sih. Ka se vaman vakis no e Ieesu', para hinhin vatëh no eah, ke' se va'aus a ra pa ma punis na to te' me no.

5

A Te' Susun Po Te' Ĕsës He' E Ieesu', To Onöt E Non Pa Kon Hah A Ra

¹ Ivëh, ke Sosenën vate' a ma Te' Susun po Te' Ĕsës He', to kiu ke ne a napan pa he' a ma he' vaeö pee manuh pe Sosenën. Me ee to nok a taate' ip vamët o vöna', ko ës ke na e Sosenën pa vahik a ma hat pa napan.

² A Te' Susun po Te' Ĕsës He' to te' akuk vavoh e non nën, ivëh, ke' vava'aus non o te' varih to hikta maaka ne pan, a tah nee to nonok ne, e' a tah hat. Ivëh, ke' he' a va'aus tö manih pa napan poë varih, suk e' koman to hara' voh en pa taate' punö'.

³ Ivëh, ko Te' Susun po Te' Ĕsës He' koman, to te' me e ne pa ma te' hat pee, pare ësës e ne na pa ma vöna' koman pee, me pa napan pa vahik a ma hat koman pee, me a ma te' hat pa napan.

⁴ Me a hikta te' ësës he' to vate' koman hah ea vamanih pa Te' Susun po Te' Ësës He', suk e' to iu kon non a tasun apuh pamëh, Ahik, e Sosoenën varoe to vaoe a te' ke' tavus en a Te' Susun po Te' Ësës He' vamanih, pa ö ne Sosoenën to vate' vavoh in e Aron me o vute' pe'.

⁵ E' to te' akuk va kov e non manih pe Kristo to hikta vate' koman hah voh ea, pan e' a Te' Susun po Te' Ësës He', suk e' to iu kon non a tasun apuh pamëh. Ahik. Ivëhkëk, e Sosoenën to vate' voh poan, ko vanënën suk poan manih po Puk Vaëhëh pan,

“Eën e Koa' peö',

kuru eö' e Tamömah.”

Sng 2:7

⁶ Manih pa meh soe, komön o Puk Vaëhëh ne Sosoenën to soe pan,

“Eën se te' nom a te' ësës he' va pa ma tamoaan.

Eën se te' nom a te' ësës he' vamanih pa ö ne
Mëlkisëtëk

me o vute' pe' to te' vavoh ne.” *Sng 110:4*

⁷ E Ieesu' to te' to'to' avoe' voh e non manih po oeh, pare' hinhin vakis rakah voh non, pare' okook non e Sosoenën se va'aus poan ke' nat non mët. Suk ataeah, e' to vöknah voh ea, ko vavatet non o iu pe Sosoenën. Ke Sosoenën pënton en pe', pare' vaeh poan ke' hikta nanaöp non a mët.

⁸ Ivëhkëk, e Ieesu' to te' ro voh e non e Koa' pe Sosoenën, e' to kon kamis voh en, ko kamis pamëh, to vavaasis poan pa vatet a taate' pënton soe pe Tamaneah.

⁹ O kamis me a sun hah pe Ieesu' to vapuh vavih poan, ke' tavus voh en a te' se kon hah a ra, ka te'

va'peh me no eah po to'to' tamoaan, ea o te' varih to pënton no eah.

¹⁰ Ke Sosenën soe vatvus voh en pe', pare' soe pan, e' a Te' Susun po Te' Ēsēs He' vamanih pa ö ne Mëlkisëtëk, me o vute' pe' to te' vavoh ne.

Ea Se Nat No Te' Va No Manih Po Si' Koa'

¹¹ Eö' to te' me no' a ma tah peo vihvih to hiva' ne pa vamaaka, nö' se soe ka neöm, suk a Te' Susun po Te' Ēsēs He' vëh, e Kristo. Ivëhkëk, eöm to hikta kokon vamaaka oho' nem, paröm hikta onöt nem a vatet.

¹² Eöm to tavus voh em o te' to vavatet nem e Ieesu'. Ivëh, köm se vavaasis pet a ma meh te' a soe pe Sosenën vëh nöm to pënton voh, ivëhkëk, eöm to hikta nok voh. Ivëh, ka meh te' se vavaasis hah a neöm a pusun o vavaasis vamomoaan va pa soe pe Sosenën. Eöm se pënton o vavaasis eh to te' va non manih pa te' se ëën en pa taëën eh, ivëhkëk, eöm to rës avoe' e nem vamanih po te' to vameme' ne.

¹³ Ivëh, ko te' to hikta kokon vamaaka oho' ne o vavaasis eh pamëh, ee to te' va e ne manih po te' to vameme' ne, pare te' va e ne manih po koa'. Ee to hikta nat ne pa taate' totoopin heh nee se suk, me a taate' hat heh nee se koe.

¹⁴ O vavaasis eh to te' va non manih pa taëën eh. A taëën eh, e' a taëën pa nap apa'puh, nee to vaasis hah rea, pare inan pataeah to te' vih non me a tah hat, ko vatet a tah to te' vih non.

6

Ea Se Te' Vakis No Ko Anoeh No E Sosenën Se Vavih A Ra

¹ Ivëh, ka se nat no te' avoe' no manuh po vavaasis vamomoaan suk e Kristo. O vavaasis vamomoaan pamëh to te' va non manih po vaasis pa te' vameme'. Ea se te' va no manih pa te' natsean to vavaasis, ko iu avoe' e non pa kon a ma meh vavaasis suk e Kristo. Ivëh, ka se nat no te' avoe' no manuh po vavaasis vamoaan suk e Kristo, o vavaasis pamëh to kunkuin a komaara, pan ea se he' tonun a ma taate' to hikta te' me ne o to'to' man manih pee, me ea se vaman e Sosenën.

² A ma vavaasis vamomoaan suk e Kristo, ivarih, a ma vavaasis va pa taate' vapupui no o Jiu' to vatet ne,* me a vaho' a koreera manuh pa pasun a te', me o vavaasis va pa mët me a sun hah, me o vavaasis va pa kiiki a ma napan va po to'to' tamoan.

³ Ivëh, ko vaman pea se nönö nö non, ko tavus na pa ö na se kon o vavaasis natsean, vamanih pa ö ne Sosenën to iu va ka rora.

⁴ A napan varih to pënton voh ee pa soe pe Sosenën ko vaman ee, ivëhkëk, ee to hahah ee po vavaasis vamomoaan suk e Kristo, e'e to hikta onöt rakah ne a panih, ko vaman hah a soe nee to pënton voh. Ee to kon voh a Tuvuh Vasio' vamanih po he' pe Sosenën pa nok a kiu pe'.

⁵ E'e to nat voh ee pa ö no a soe pe Sosenën to vih va non. Pare hara' voh ee po kikis pe Sosenën se matop amot e non pa ma napan.

⁶ A napan poë varih se keh hah ee po vavaasis vamomoaan suk e Kristo, ee to hikta onöt rakah ne a panih hah ma'. Suk ataeah, a taate' hah manuh

* **6:2:** a taate' vapupui no o Jiu' to vatet ne. A ma taate' po Jiu' va pa vavoon a napan pa taate' vauhu po Jiu', e' to te' ke e non pa pupui vëh na to vavatet no kuru.

pa taate' vamoan to vatoe va e non manih pee to ni hah ee pe Koa' pe Sosenen manih pa kuruse. A tah pameh to te' va non manih pa ma meh te' to vavovoeak hah ne e Ieesu' vamanih pa ö nee to nonok moan vavoh ne pa ö ne Ieesu' to han voh non pa kuruse.

⁷ O upöm te' to te' va ne manih po oeh ne Sosenen to vanö ma' a uhön ke' vavih o oeh ka ma moeh taëen pupu vavih ne nen ka napan enëen ne.

⁸ Ivëhkëk, o upöm te' to te' va e ne manih po oeh to te' me non o meon to'to', o meon to'to' se keh pu topnin a ma taëen, ee hikta se te' vih hah ne. O oeh se keh hikta vavoa' vavih a taëen e Sosenen se mirö' en pe'.

⁹ Ivëhkëk, eöm a ma vamomhë peö', emöm to hikta koman nem a soe vapipino' va po oeh hat to huh a non neöm. Emöm to nat e nem pan, eöm to kon a tapui o pöh apuh, ke Sosenen se kon hah a neöm, ivëh, kôm nonok nem a ma kiu vihvih va pa va'aus a napan.

¹⁰ E Sosenen a totoopin tamooan, e' hikta se anoe non o iu nöm to vataare nem manih pe', pa ö nöm to nok a ma kiu va'aus vih varih nöm to nonok tamooan nem manih po te' varih to vaman ne e Ieesu'.

¹¹ Emöm to iu suntan rakah nem pan, eöm se vavetet rakah nem a taate' vih vëh, ke' öök na po poen no a ma tah na to anoeh no, se tavus vaman.

¹² Ea hikta se te' no o te' karauh, ivëhkëk, ea se vatet a kiu vih no te' va po vaman to nok voh, para vaman, ko anoeh no, ko kon a ma tah vih ne Sosenen to soe vaman voh.

Ea Se Vaman No A Soe Man Pe Sosenen

¹³ Ivëh, ke Sosenën soe vaman ke voh e Abraham pa ö ne' se nok o vatompoan pa tah ne Sosenën se nok. Suk ahik voh ta te' to apuh oah non o kikis pe Sosenën. Ke Sosenën vate' a ëhnaneah pa nok o vatompoan pe' pen Abraham.

¹⁴ E Sosenën to soe ke Abraham pan, “Eö' to soe vaman voh ka oah a ö nö' se tapui rakah a oah, ko he' a oah a ma pus koa' peo.”

¹⁵ A ma tamooan ne Abraham to te' voh non pa taate' anoeh, pare' kon en pa ma tah ne Sosenën to soe vaman ke voh poan.

¹⁶ Ivëh, ka te' se keh iu non a soe pe' se man rakah, e' se poka' a meh te' no a ëhnaneah to apuh oah non a ëhnan komaneah, ka soe man pamëh se vatö o kokoman pa te', ivëh, ka taate' heve se nat non te' non topnin a poa te'.

¹⁷ E Sosenën to kehkeh vamaaka voh ke non o te' varih to se vaneah a ma tah ne' to soe vaman voh. E' hikta se panih hah non a soe vaman pe'. Ivëh, ke' vaho' a soe kikis pa tah ne' to soe vaman ke voh raoe.

¹⁸ E' to te' non a poa tah man varih, a soe kikis me a soe vaman ne Sosenën to hikta se panih rakah non. E Sosenën hikta se piuk non manih pa ö ne' to soe a soe vaman pe'. Me Sosenën hikta se piuk non manih pa ö ne' to soe a soe kikis pe'. Ivëh, ka napan varih to panih a taate' hat moaan pee, ko he' rea manih pe Ieesu', se anoeh ko ötöön vakis ne o vaman ne' to he' raoe.

¹⁹ Ea to te' me no a taate' anoeh manih po kokoman pea vamanih pa anka' to ötöön non o parö' ke' atan non. O vaman pea manih pe Ieesu' se te' eh non, suk o vaman pamëh to me ho a ra

pa rum vapenpen vëh to te' non tonun o rara rë.[†] Ivëh, ka se huk vatët manuh pe Sosenën vöh pa vöön va kin.

²⁰ E Ieesu' to vovoh ho ka ra manuh pa vöön va kin. Vamanih pa Te' Susun po Te' Ēsēs He' va pa ma tamoaan, me vamanih pa ö ne Mëlkisëtëk me o vute' pe' to te' vavoh ne.

7

E Mëlkisëtëk E' A Te' Ēsēs He'

¹ Ivëh ke Mëlkisëtëk, e' a te' sunön va vöön Salëm. Pare' te' non a te' Ēsēs he' pe Sosenën Kikis Vi. E Abraham to hah tane' ma' po vapus pa ö ne' to vapus, ko vöknah a ma te' sunön, me a nap vëvënsun pee. Pare' akeh e Mëlkisëtëk manih hanan, ke Mëlkisëtëk tapui en pe'.

² Ke Abraham ki en pa ma tah, pare' he' en pe Mëlkisëtëk pa ma papaeh va pa ma havun tah ne' to ip këh po te' susunön pare' kon ma'. A pusun in ö ëhnan vëh, e Mëlkisëtëk ivëh, “A te' sunön va pa taate' totoopin.” Suk ataeah, e' a te' sunön va Salëm, ko ëhnan vëh a te' sunön va Salëm to soe non pan, “A te' sunön kamö’.”

³ Ahikta kiun to soe vanat non pan, e Mëlkisëtëk to te' me voh non e tamaneah pen sinaneah, me ahikta ö to soe vanat non o poen ne' to koa' voh ma', me o poen ne' to mët. E' me voh ahikta ma sipuneah. E'e' me to te' va e non manih pe Koa'

[†] 6:19: O rara rë to han pip non a paeh rum vapenpen koman a Iuun Hinhin Apuh po Jiu'. Ka Te' Susun po Te' Ēsēs He' varoe se ho po paeh poen komön o pöh kirismas. E Ieesu' me to ho pa ö vapenpen vöh pa vöön va kin pa va'aus a ra, ka huk vatët manuh pe Sosenën.

pe Sosoenën, pare' te' non a te' ësës he' va pa ma tamoaan.

⁴ Eöm se ep a ö no a tasun apuh pe Mëlkisëtëk to te' va non. E Abraham e sipuura to te' vavoh non nën. E'e' to kon voh a ma papaeh va pa ma havun tah ne' to kon voh pa ö ne' to ip këh voh pa ma te' susunön, pare' he' e Mëlkisëtëk, suk a tasun apuh pe'.

⁵ A kën sipun e Livaë, varih o te' ësës he' to vatet ne o Vavaasis pe Mosës, pa öt a ma papaeh va pa ma havun tah manih pa ma te' poëëre varih a napan va Israël. Ivëhpëhkëk, e'e a ma pus koa' pe Abraham.

⁶ E Mëlkisëtëk to hikta te' voh non pan, e' a te' va po vute' pe Livaë. Ivëhkëk, e' to öt voh en pa ma papaeh va pa ma havun tah manih pe Abraham, pare' tapui en pe Abraham a te' to vaman voh a soe vaman pe Sosoenën.

⁷ Ea to nat e no pa te' vëh to tapui a meh te', e' to kikis oah e non pa te' vëh to kon a tapui.

⁸ Manih po te' ësës he' e'e to ötöt ne a ma papaeh va pa ma havun tah. O te' poë varih to mëtmët voh ee. Ivëhkëk, a te' vëh e Mëlkisëtëk to öt a ma papaeh va pa ma havun tah to te' tamoaan e non vamanih, pa ö no Puk Vapenpen to soe va non.

⁹ O vute' pe Livaë to kokon voh e ne pa ma papaeh va pa ma havun tah. Ivëh, ka antoen e no pa soe vamanih pan, o Livaë to he'he' koe voh ne manih pe Abraham, ke Abraham he' pet a ma papaeh va pa ma havun tah pee manuh pe Mëlkisëtëk.

¹⁰ E Abraham to akeh voh e Mëlkisëtëk, e Livaë he me' avoe' voh e non pa koa' ma' po poen ne

Abraham to he' e Mëlkisëtëk a ma papaeh va pa ma havun tah pe'.

E Ieesu' To Te' Va E Non Manih Pe Mëlkisëtëk

¹¹ Moaan voh a taate' va pa kiu pa te' ësës he', me o Vavaasis pe Mosës to tane' voh ma' manuh pe Mosës, ko öök ma' manih po Livaë. Ivëh, no a napan va Israël to vavatet suk hah ne o Vavaasis pe Mosës no te' ësës he' po Livaë to vovoh ne. O te' ësës he' va po vute' pe Aron se keh te' totoopin voh ne, e' hikta se te' hah non to meoh vu te' ësës he', se te' va ne manih po vute' pe Mëlkisëtëk.

¹² O kiki va po Vavaasis pe Mosës to tane' ma' manih pa taate' va pa kiu po te' ësës he'. Ko meoh vute' se keh kon a kiu pa te' ësës he', a kiu pa te' ësës he' pamëh nee to vavatet moaan ne, se panih en. Ivëh, ko kiki va po Vavaasis pe Mosës se panih me en.

¹³ Ivëh, ke Ieesu' e Sunön pea no a soe pe Sosenën manih po Puk Vapenpen to vanënën suk voh non poan pan, e' a te' va po meoh vute' ke. O vute' pamëh to hikta öt voh ne a taate' va pa kiu pa te' ësës he'.

¹⁴ E Sunön pea e Ieesu' e' a te' va po vute' pe Juda'. Ivëh, ke Mosës hikta soe voh ta pah soe manih po vute' poë varih se kon a kiu pa te' ësës he'.

¹⁵ Ivëh, ka nat vamaaka ee, pa meh te' ësës he' voon e Ieesu' to tavus en. E' to vatoe va e non manih pe Mëlkisëtëk.

¹⁶ E' to hikta tavus te' ësës he' vavoh manih pa ö ne' to tavus tane' ma' po vute' po te' ësës he'. Ahik. E' to tavus voh a te' ësës he' manih po kiki va po to'to' tamooan.

¹⁷ Manih pa ö no Puk Vapenpen to soe va non,

“Eën se te' nom a te' ësës he' va pa ma tamooan,
vamanih pa ö no vute' pe Mëlkisëtëk to te'
vavoh ne.” *Sng 110:4*

¹⁸ Ivëh, ka taate' moaan va pa kiu pa te' ësës
he' na se vahik eah, suk ataeah a taate' pamëh to
hikta te' kikis onöt non pa va'aus a napan, kee te'
totoopin ne pa matan e Sosoenën.

¹⁹ Pe' a taate' kiu pa te' ësës he' po Livaë to hikta
onöt voh non a vatotoopin a ma hat pa napan.
Ivëhkëk, a kiu pa te' ësës he' vëh e Ieesu' to vih oah
e non pa taate' va pa kiu pa te' ësës he'. A meh kiu
pa te' ësës he' vëh e Ieesu', ivëh, e' to vatvus a taate'
anoeh, ka huk vatët ee manuh pe Sosoenën.

²⁰ E Sosoenën to soe voh a soe kikis, pa ö ne' to
vate' e Ieesu' pa kiu va pa te' ësës he'. Moaan voh a
hikta soe kikis no Livaë to vate' voh manih pa kiu
pa te' ësës he'.

²¹ Ivëhkëk, e Ieesu' to tavus a te' ësës he' pa soe
kikis ne Sosoenën to soe vamanih pe' pan,
“Eö' e Sunön to soe a soe kikis peö',
parö' hikta se panih hah no' o kokoman peö'.
Eën se te' nom a te' ësës he' va pa ma tamooan.”

Sng 110:4

²² Ivëh, ke Ieesu' vapuh en po vatompoan voon
topnin e Sosoenën me a napan pe'. O vatompoan
pamëh to te' vih oah e non po te' vatompoan
vamoaan, suk e'e to hikta vavatet voh ne.

²³ A napan to tatavus te' ësës he' voh ne, pare
mëtmët këh e ne pa kiu pamëh. Pare hikta onöt ne
a nok varë a kiu pee.

²⁴ Ivëhkëk, e Ieesu' to te' tamooan e non, ka kiu
pe' hikta se panih non, vamanih po Livaë, o te' ësës
he'. Ivëh, ke' hikta se he' non ta meh te'.

²⁵ Ivëh, ke Ieesu' onöt e non pa nok a kiu pa te' ësës he' pa va'aus tamoaan a ra, a napan varih to hinhin koe ne e Sosenen manih pe Ieesu'. Suk ataeah, e' to te' tamoaan me e non pe Sosenen, pare' hinhin ke non pea.

²⁶ Ivëh, ke Ieesu', e' a Te' Susun po Te' Èsës He', pare' onöt e non pa va'aus a ra. Suk e' a vivihan no a hikta pah hat to te' non manih pe'. E' a vivihan no a taate' pe' to te' ke e non pea a nap nonok hat, ka ëhnaneah to te' oah e non pa ma moeh tah kurus varu pa vöön va kin.

²⁷ E' to hikta te' va non po upöm Te' Susun po Te' Èsës He', e' to hikta iu non a taate' va pa he' me a ës ke na e Sosenen o vöna' pa ma poen kurus, pa vahik a ma hat pa napan, me e' koman. E' to he' vavoh in manih po he' manuh pe Sosenen.

²⁸ O Vavaasis pe Mosës to sosoe voh non pan, o Livaë se vate' a Te' Susun po Te' Èsës He' pa nok a kiu pamëh. Ivëhkëk, a kiu pee to hikta kakis onöt non a vahik a ma hat pa napan. Ivëh, ke Sosenen soe voh a soe kakis se tavus amot ma' manih pa taate' va pa vate' e Koa' pe' Ieesu'. E koa' pamëh no kakis pe' to onöt e non pa vahik a ma hat pa napan. E' a vivihan, pare' te' tamoaan e non.

8

E Ieesu' A Te' Susun Po Te' Èsës He' Va Pa Vöön Va Kin

¹ Iva'ih, a pusun in a ma soe nö' to he' varu' a neöm. Ka te' me e no pa Te' Susun po Te' Èsës He' vëh to iho' non pa papmatö pa ö ihiho' vasio' pe Sosenen.

² A te' ësës he' pea e Ieesu', to kiu non pa ö vivihan te'te' pe Sosenën, no a hikta te' to nok voh.

³ O te' susun po te' ësës he' to te' ne pa he' a ma he' me a ës ke na e Sosenën o vöna'. Ka Te' Susun po Te' Èsës He' pea e Ieesu', to te' me e non po he' ne' se he' na e Sosenën, o he' pamëh, ivëh e'e' koman.

⁴ Ivëh, ke' se keh te' voh non po oeh, e' hikta se te' voh non a te' ësës he' manih po oeh. Suk ataeah, o te' ësës he' manih po oeh to he' vahik voh ee na pa ma he' to vatet ne a kiu po te' ësës he' varih o Livaë.

⁵ A iuun te'te' vah vëh no te' ësës he' to kiu ne koman, to vëknöm non a iuun vivihan te'te' pe Sosenën manuh pa vöön va kin. E' to vatoe akuk va kov e non manih pa ö ne Mosës to ekeok vavoh non a ö te'te' pe Sosenën, vamanih pa ö ne Sosenën to vataare voh ke poan, pare' soe pan,

“Eën se eok suk a ö nö' to vataare vavoh ka oah manuh kin pa tope.” *Eks 25:40*

⁶ Ivëhkëk, a kiu pa te' ësës he' ne Ieesu' to kon voh, to apuh oah e non pa ma meh te' ësës he', me e' a te' vatopnin. E' to te' akuk va kov e non manih po vatompoan voon ne' to nok topnin e Sosenën me a napan pe'. Suk ataeah, a ma soe vaman vakuru ne Sosenën to he', kee te' vavih oah e ne pa ma te' vamomoaan.

⁷ O vatompoan vamoan pe Sosenën me a napan se keh te' onöt voh e non pa vahik a ma hat pa napan, e Sosenën hikta se iu hah non to meoh vatompoan.

⁸ Ivëh, ke Sosenën taum voh a ma hat manih pa napan pe', pare' soe voh pan,
“Amot nö' se nö ma',

- ko nok o vatompoan voon me ra napan to te'
ne pa muhin va Israël,
me o vute' pe Juda'.
- ⁹ O vatompoan pamëh hikta se te' va non manih po
te' voh pa kën sipuiire.
Manih pa koreneo', nö' to me tavus këh ma'
raoe pa muhin va Isip.
E'e to hikta matop voh ne o vatompoan möm to
nok voh.
Ivëh, nö' to he' tonun suk voh raoe.
- ¹⁰ O vatompoan nö' se nok me a napan va Israël
ivëh,
eö' se vate' a taate' peö' manih po kokoman
pee,
parö' kiun eah manih pa komëëre,
kee se pënton a soe, ko vatet a taate' peö',
eö' se te' no' e Sosoenën pee,
kee se te' ne a napan peö'.
- ¹¹ Ahikta paeh va pee se vavaasis non o upöm pee,
suk ataeah ee se nat e ne peö',
taneo no ma' po koa',
ko öök no ma' pa nap apa'puh.
- ¹² Eö' se ururuan a ma taate' hat pee,
parö' ihan anoe eo' pa ma hat pee.” *Jer*
31:31-34
- ¹³ E Sosoenën to vavaato suk non o vatompoan
voon, pare' soe pan, “O vatompoan vamoaan no a
napan to hikta matop voh ne.” Ivëh, ke Sosoenën
soe pan, o vatompoan pamëh to vamoaan ko se hik
en.

9

*A Te' Susun Po Te' Ësës He' Vamoaan To Ësës Voh
Non O Vöna'*

¹ O vatompooan vamomoaan to te' me non a ma taate' va pa kē a ēhnan e Sosoenēn no te' ēsēs he' to nok manih koman a topa vasio' te'te' vah manih po oeh.

² A topa vasio' te'te' vah nee to eok, ka ö vēh mahēn to te' non a ö toktok po vau', me a pok, ka manih pa pok to te' non a taēēn nee to he'he' ne na e Sosoenēn. Ko te' ēsēs he' varoe to ēnēēn ne.

³ Ka manih tonun a ö vapenpen nee to vahan pip a ö vasio' te'te' pe Sosoenēn po rara papanö'.

⁴ Manih pa tonun o rara pamēh to te' non a pok vapenpen nee to mon voh po vös gol, pare ēsēs ne a ma tah vavuh vih nēn. Pare' te' non a pokis nee to mon po vös gol. A pokis pamēh to te' non a mana' to te' hop non pa nōh nee to nok pa gol, me o toknon pe Aron to veoh voh en, * me a poa ta vös to kiun non a havun soe vaēnpan pe Sosoenēn.

⁵ Tonun a pokis to te' non a poa ankerö' varih, a ēhnēēre o Sērupim to vēknöm ne a ö vasio' te'te' pe Sosoenēn. Ka poa paknēēre va'na'töön ne a ö nee to tatapui ne ö era' po vöna' va pa vahik a ma hat pa napan. Ivēhkēk kuru, na se hikta vahutēt vörep suk no a ma tah poē varih.

⁶ Iva'ih, a ö no a ma tah to te' vavoh ne, a te' ēsēs he' se ho manuh pa ö vamahēn pa nok a kiu pe'.

⁷ Ivēhkēk, a Te' Susun po Te' Ēsēs He' to se ho oah manuh pa koman a ö vasio' te'te' pe Sosoenēn pa nok a kiu pe' po pōh poen komōn o pōh kirismas. E' se te' ho o era' po vöna' ne' se he' na manuh pe Sosoenēn, pa vahik a ma hat pa napan nee to hikta koman ne a nok, me a ma te' hat koman pe'.

* **9:4:** Ep na po Puk Nampa', 17:6-10 to sosoe non a ö no toknon pe Aron to veoh voh en.

⁸ Ivëh, ka Tuvuh Vasio' vavaasis vamaaka en pea, pa ö no a ma tah varih to te' va ne manuh pa topa vasio' te'te' vah. Ka hanan va pa ho manih pa Ö Vasio' Oah to hikta taperet voh non pa ö no a topa vasio' te'te' vah vamomoaan to te' avoe' voh non.

⁹ A taate' va pa vaës o vöna' vamanih po he' to vataare a ra pan, e' to hikta onöt non a vavivihan o to'to' po te' varih to kë ne a ëhnan e Sosenën.

¹⁰ A ma taate' va pa pupui a ma tah varih, taëën, ruen vih kakaak, vapupui koren, me a taate' ësës vöna', e'e a ma tah va po sionin varoe to hikta onöt ne a va'aus o to'to' pea. Ivëhkëk, a ma tah poë varih to te' anoeh ro voh ne a ö ne Sosenën se panih en pee manih po vatompoan voon.

¹¹ Ivëhkëk, e Kristo to nö vavoh ma' manih pa Te' Susun po Te' Èsës He', pare' panih en pa ma tah vomoaan to te' voh ne, e' to panih en pa taate' va pa ës o vöna', me a he' a ma he' manuh pe Sosenën. Manuh pa vöön va kin a iuun vasio' to te' apuh oah e non, pare' totoopin, no hikta te' to nok voh. A tah vih ivëh, e Kristo to mët ko sun hah, pare' nö nën pa nok a kiu pa Te' Susun po Te' Èsës He', pare' panih en po vatompoan vomoaan.

¹² E Kristo to voen hah a ra po era' pe', pare' he' a ra o to'to' tamooan. Pare' ho manuh pa iuun vasio' vöh pa vöön va kin po pöh poen ro. Ivëhkëk, e' hikta te' o era' va po vöna' pa he' vamanih po he'.

¹³ O era' pa meeme', me a purmakaö' apuh, me o kukuvun in a purmakaö' seka' nee to ës. Pare varapök manih pa napan varih to te' me ne a ma hat, ka ma hat tera' varoe pa napan to hik ee. Ivëhkëk, o era' pe Kristo to kakis oah e non po era'

pa vöna'. O era' pe Kristo to ihan anoe a ma hat tera', me a ma te' hat kokoaan pa napan.

¹⁴ A tah vëh to tavus man en pa ö ne Kristo to vapuh en pe' po era' pe'. A Tuvuh Vasio' to va'aus poan manih pa ö ne' to he' ea manuh pe Sosoenën vamanih po he' vih vivihan te'te' tamooaan. O era' pe' se pupui a ma kokoman vakooaan pea, ka koe a ma taate' hat moaan poë varih, se me en pea pa mët. Ivëh, ka se nonok no a kiu pe Sosoenën to'to' tamooaan.

¹⁵ Ivëh, ke Kristo kiu non topnin o vatompoan voon po te' varih, ne Sosoenën to vaoe se kon a tapui te'te' tamooaan, ne' to soe vaman voh. A tah vëh se tanok suk e Kristo to mët, marën a voen hah raoe, pare' vahik en pa ma hat pa napan to te' voh ne paan o vatompoan vamooaan.

¹⁶ A te' se keh kiun en pa soe vaonöt pa tah ne' to vaneah non no a meh te' se kon, ahikta te' to onöt non a kon, ke' öök non po poen ne tövaneah se mët. Po poen ne' to maaka pan, e tövaneah to mët en, a meh te' to onöt e non pa kon a ma tah varih pa ö no a soe vaonöt to soe va non.

¹⁷ A soe vaonöt pamëh to hikta te' non ta tah pa ö no a te' to kiun a soe vaonöt to te' to'to' non. A te' vëh no a soe vaonöt to vaonöt ke poan, e' se kon varoe pa ö no a te' pamëh to kiun a soe vaonöt to mët en.

¹⁸ Ivëh, ko vatompoan vamomooaan to te' vaeh koe voh non manih po era' in o vöna'.

¹⁹ Vamomooaan ne Mosës to soe ke ra napan a ma taate' pe Sosoenën. Pare' kon o era' pa meeme' me a purmakaö' seka', ko hovën pa ruen, pare' tai ma' a popoko' naon, ko pöm po kuri, ko varu na pa nam era', pare' kon hah, ko rapis a napan va'peh me o

puk vëh no a soe pe Sosenen to kiun non.

²⁰ Ke Mosës soe pan,

“Iva'ih, o era' to vaeħ non o vatompoan ne
Sosenen to he' voh a neöm,
nöm se vavatet nem.” *Eks 24:8*

²¹ E' to nok pet va en nēn manih pa iuun te'te' pe
Sosenen, me a ma moeh tah varih nee to kē ne a
ēħnan e Sosenen.

²² Manih po Vavaasis pe Mosës to soe non pan, a
ma meh tah, me a ma hat pa napan na to pupui
vavoon nō no po era' po vōna'. Ivēħ, ke Sosenen
hikta onōt non a iħan anoe a hat pa napan, pa ō no
era' se keh hikta tako'.

O Era' Pe Kristo To Pupui Vavoon A Ra

²³ Ivēħ, ka ma tah kurus varih koman a topa
vasio' pamēħ,† nee se pupui vavoon po era' po
vōna', to vēknöm ne a ma tah to te' ne pa vōön va
kin. Ivēħkēk, a ma tah va pa vōön va kin to iu ne o
era' to te' vih oah rakah non.

²⁴ Ivēħ, ke Kristo to ho voh en pa vōön va kin pa
iuun vapenpen pe Sosenen, a iuun pamēħ no a
hikta te' to eok. Ivēħ, ke' te' ka no mā' ra manuh
pa vōön va kin va'peħ me Sosenen.

²⁵ O Te' Susun po Te' Ēsēs He' po Jiu', to oho voh
ne pa piprom vivihan va'peħ me o era' po vōna', po
pōħ poen komōn o pōħ kirismas, pa ma kirismas
kurus. Ivēħkēk, e Kristo to hikta he' vapeo o era'
pe'.

²⁶ Ivēħ, ke Kristo hikta kon kamis vapeo voh,
taneo non po poen ne Sosenen to nok o oeh, ke'
öök non po poen vēħ kuru. E' to koa' voh mā'

† 9:23: [... a topa vasio' ...] E' a ō ne Sosenen to te'te' non.

manih po oeh, ko mët ko sun hah, pare' hikta se mët hah non. Ahik rakah. E' to tavus manih po poen vëh kuru pa ö ne Sosoenën to vaeh o vatompooan voon. E Sosoenën to vaeh o vatompooan voon pa ö ne' to vanö ma' e Kristo, ke' he' ea vamanih po he' to ihan anoe non a ma hat kurus pa napan.

²⁷ Ea se mët a paeh mët ro, ko vasuksuk ne Sosoenën se kiiki a ma hat na to nok.

²⁸ Ivëh, ke Kristo mët voh en, ko he' ea vamanih po he' va pa ihan anoe a ma hat pa napan kurus. E' to hikta se vapöök mët hah non, suk a ma hat pa napan. Ivëhkëk, e' se hah en ma' pa kon hah o te' varih to vamatop ko anoeh ne a hah pe'.

10

A Ma He' Vamooan To Hikta Vahik Non A Ma Hat

¹ O Vavaasis pe Mosës to te' vavoh non manih po vëknöm akuk in a ma tah se tavus amot ma'. Ivëhkëk, a ma he' varih nee to he'he' ne pa ma pah kirismas hikta onöt ne a vavivihan o te' varih to nö ne manuh pe Sosoenën pa vasunön eah.

² A vöna' ës se keh onöt e non pa vavoon a ma napan, ivëh, ko te' ësës he' hikta se ësës hah ne o vöna'. E Sosoenën se keh ihan anoe rakah en pa ma taate' hat pa napan kurus varih to nönö ne ma' pa vasunön eah, a, a napan poë varih se tavus vavoon ee pa pah he' ro, pare hikta se teen hah ne ta hat.

³ Ivëhkëk, a ma he' poë varih nee to he'he' ne pa ma pah kirismas pa vahik a ma hat pee, a ma he' poë varih to soe vanat hah varoe non raoe a ma hat pee.

4 Suk o era' pa meeme' ke' a purmakaö' to hikta onöt non a vahik këh raoe a ma hat pee.

5 Ivëh, ka tëëm ne Kristo to iu nõ voh non ma' po oeh vëh, e' to soe ke Tamön a soe vëh no a te' vanënën soe to kiun voh, ko soe pan,

“Eën to hikta iu hah nom o era' va pa vöna' no a te' ësës he' se he' vamanih pa ma vu he'.

Ivëhpëhkëk, eën to he' a neo' o sionin vamanih po he' va pa vahik a ma hat pa napan.

6 Eën to hikta vaeö hah me nom o vöna' varoe nee to ësës ne manuh pa pok vapenpen, vamanih po he' va pa vahik a ma hat.

7 Kuru eö' to soe vamanih,

‘Eö' ivëh e Ieesu', se vatet eo' po iu pën, Sosenen.

Vamanih pa ö nee to kiun suk vavoh ka neo' po Puk Vapenpen.’ ”

Sng 40:6-8

8 E' to soe momoan en pan, e' to hikta iu hah non a ma vöna' nee to ësës ne manih pa pok vapenpen, vamanih po he' va pa vahik a ma hat. E'e' to soe ro voh en, ivëhkëk, o Vavaasis pe Mosës to soe vakis avoe' e non pan, e'e se ësës vöna' avoe' e ne.

9 Pare' vapöök soe ken pe Sosenen pan, “Eö' se vatet eo' pa ma tah nën to iu nom.” Ivëh, ke Sosenen to vahik en pa taate' vamoan va pa ës o vöna', pare' vate' varu' en po he' voon va pa vahik a ma hat pa napan.

10 E Ieesu' Kristo to vatet voh o iu pe Sosenen, pö ne' to he' a sionineah, ko mët suk a ra pa paeh tëëm ro. Ivëh, ka tavus ee o te' vivihan.

11 O te' ësës he' po Jiu' to susun ne pa nok a kiu pa ma poen kurus. Ivëhkëk, o vöna' poë varih nee

to he'he' ne vamanih po he' to hikta se vahik non a ma hat pa napan.

¹² Ivëhpëhkëk, e Ieesu' to he' paeh ro voh ea vamanih po he', to te' vih oah e non pa taate' va pa ës o vöna', pa ö ne' to mët ko sun hah, pare' iho' non pa papmatö pe Sosenën. Suk a kiu va pa voen hah a ra to hik en.

¹³ Kuru e Ieesu' to iho' non pa papmatö pe Sosenën, pare' anoeh avoe' e non po poen ne Sosenën se vaho' o te' varih to vakihat me ne poë, kee vapaan ke ne poë.

¹⁴ Ivëh, ke Ieesu' to mët a paeh tëem ro, ka tah pamëh to nok a ma napan, kee tavus ee o te' vivihan va pa ma tamooan.

¹⁵ A Tuvuh Vasio' to soe tavus momooan voh en manih po Puk Vapenpen pan,

¹⁶ “E Sosenën to soe pan, ‘Iva'ih o vatompoan nö' se nok me raoe.

Amot nö' se kiun a ma taate' peö' manih po kokoman pee.

Me eö' se vaho' manih po to'to' pee.’ ” *Jer 31:33*

¹⁷ Pare' sosoe avoe' e non pan,

“Eö' hikta se koman hah no' a ma hat pee me a taate' vatösoe pee.” *Jer 31:34*

¹⁸ Ivëh, ka taate' va pa ës o vöna' va pa vahik a ma hat, ne Sosenën to hikta iu hah non. Suk a ö ne' to ihan anoe vahik voh en pa ma hat poë varih.

Ea Se Huk Vatët Manuh Pe Sosenën

¹⁹ Ivëh, kën kea, manih pa mët pe Ieesu', ea to te' me no po vaman, ko hikta se naöp no a huk vatët manuh pa ö vapenpen oah te'te' pe Sosenën.

²⁰ Moaan voh o rara to han pip voh non a ö te'te' pe Sosoenën koman a Iuun Hinhin Apuh. O rara pamëh to tasi vakëh po poen ne Ieesu' to mët pa kuruse. Ivëh, ke Ieesu' to peret ka ra a hanan voon va pa huk vatët manuh pe Sosoenën, pa ö ne' to mët ko sun hah, pare' te' to'to' tamoaan e non.

²¹ Ivëh, ka te' me e no pa Te' Susun po Te' Èsës He' to matop a rora a napan pe Sosoenën.

²² Ivëh, ka se huk vatët ee manuh pe Sosoenën, me o vaman kikis, va'peh me o pöh kokoman, suk o to'to' pea to voon va en manih pa ö na to vahu pa ruen maaka.

²³ Ea se öt vakis o vaman pea ko anoeh no o va'aus pe Sosoenën, suk ea to vaman no a ö ne' se suk en pa soe man pe'.

²⁴ Ea se koman no a ma meh te' pea va po vaman, ko vakikis hah a no, para nok a taate' iu te', me ea se nok a ma taate' vih manih pa topniira.

²⁵ Ea se koe a vakah a taate' te' vatönun pa vasunön e Sosoenën pa taate' hin vamanih pa ö no upöm te' to nonok va ne sih. Ivëhpëhkëk, ea se vakikis a ma meh te' pea va po vaman, ka se te' kikis no po vaman, ko anoeh no o Poen apuh ne Ieesu' Kristo se nö ma' pa kiiki a ma napan.

²⁶ Ahik hah ta hanan va pa vahik a hat pa ö na to nat e no pa soe man na to kon voh ee. Ivëhpëhkëk, ea se keh he' tonun avoe' e no pe Ieesu', me a Tuvuh Vasio', ka hik hah ta meh hanan va pa vahik a hat pamëh.

²⁷ Ivëh, ka ma te' to pënton voh ee pa soe vih pe Sosoenën, pare he' tonun avoe' e ne, a napan poë varih ne Sosoenën se kiiki en pee, suk a ma taate' hat pee. Ka nap hat vatösoe ne Sosoenën se vanö

en pee po sura' ësës tamooan.

²⁸ O te' to vatösoe ne, ko hikta vavatet ne o Vavaasis pe Mosës, ivëh ka pöök, ke' a kukön te' nat i raoe, pare vavatët raoe manih po te' pëpënton vahutët, kee ip vamët ee pee, me ahik to ururuan.

²⁹ E Sosoenën se po' nok vah va in a te' vëh nih no era' pe Ieesu' to vavoon poan, ke' he' tonun e Koa' pe Sosoenën, me a vaörakuk o era' pe Ieesu', me a Tuvuh Vasio'? A te' pamëh se kon kamis oah rakah, suk a taate' vatösoe pe'.

³⁰ Ea to nat e no pa soe ne Sosoenën to soe voh manih po Puk Vapenpen, pare' soe pan,

“Eö' se vakmis o te' varih to nonok ne a ma hat, parö piun koman eo' pa ma hat pee.” *Lo 32:35*
Pare' soe pet en pan,

“E Sunön koman se kiiki a ma hat pa napan pe'.” *Lo 32:36, Sng 135:14*

³¹ Ivëh, ka soe pamëh to va'naöp non a napan ne Sosoenën to'to' tamooan se keh öt raoe ko vate' raoe po vahutët.

³² Eöm se nat nem anoe a ma poen vamoan, moaan voh ne eöm to nat e nem pa soe pe Sosoenën, paröm panih a ma taate' hat peöm, a taate' panih peöm nöm to kon kamis suk voh em. Ivëhkëk, eöm to öt vakis voh em po vaman peöm.

³³ A ma pöh poen nee to vasun voh a neöm pa matëëra napan pa vöknah a neöm, ko vakmis a neöm. Ka ma meh poen me nöm to te' hop voh e nem pa ma te' varih, nee to nonok vahat ne raoe.

³⁴ Ivëh, köm kon kamis va'peh me voh em po te' nohnoh, paröm te' vaeö e nem, po poen vëh ne to kon këh a neöm a ma tah nöm to vaneah nem. Pe'

eöm to nat e nem pa tah vih, ivëh, o to'to' tamoaan to anoeh e non ma' peöm manuh pa vöön va kin.

³⁵ Ivëh, köm se koe a vakah o vaman peöm manih pe Ieesu', suk ataeah, e Sosoenën se he' amot en peöm po voen apuh va pa vöön va kin.

³⁶ Eöm se te' me nem a taate' anoeh pa ö nöm to vatet nem o iu pe Sosoenën. Ivëh, ke eöm se kon em pa ma tah ne' to soe vaman voh ka neöm.

³⁷ Ivëh, ke Sosoenën soe vamanih komön o Puk Vapenpen pan,

“E' hikta se te' rë non, ka te' vëh ne Sosoenën to vate' se nö en ma'.

³⁸ A napan peö' varih to vavatet ne a taate' to-toopin,

ee se te' to'to' tamoaan e ne, suk e'e to öt vakis ne o vaman pee.

Ivëhkëk, a paeh va pee se keh tarih hah manuh pa ma taate' moaan pe',

ko he' tonun a neo',

eö' hikta se te' vaeö va'peh hah me no' eah.” *Hab 2:3-4*

³⁹ Ivëhkëk, ea hikta te' hop no po te' varih to ahah ne pa ma taate' moaan pee. Ee se ro po sura' ësës tamoaan. Ivëhpëhkëk, ea to te' me no o vaman manih pe Ieesu', ke' kon hah en pea.

11

A Taate' Vaman

¹ Ka taate' va po vaman to te' va non manih, ea to nat vavih va e no manih pan, a tah na to anoeh no se tanok, e' se tanok en. Ea to hikta ep avoe' no pa tah pamëh na to nat no pan, e' se tanok, ivëhkëk, e' se tanok amot en.

² Ivëh, ka manih po vaman pe sipuura ne Sosoenën to vaeö me raoe, suk ee to vaman ne a soe vaman pe'.

³ Manih po vaman pea, ea to maaka e no pan, e Sosoenën to nok voh a akis, me o oeh manih pa soe varoe ko pe'. Ivëh, ka ma tah varih na to ep no, ne Sosoenën to nok tane' manih pa ma tah na to hikta onöt no a ep.

⁴ E Ebel to vaman voh a soe vaman pe Sosoenën, ivëh, ke' he' o he' va pa vöna' manuh pe Sosoenën to vih oah e non po te' he' pe kea pe' Keen. Manih po vaman pe Ebel, e Sosoenën to poka' voh poan a te' totoopin. Ke Sosoenën vaeö in o he' pe'. E' to mët voh en, ivëhkëk, a taate' vaman pe' to vavaasis avoe' e non pea pa vatet a taate' pamëh.

⁵ E Inök to vaman voh non a soe vaman pe Sosoenën, ivëh, ke' nö en pa vöön va kin, e' hikta mët, ivëh, ka napan hikta taum voh poë. E Sosoenën to me këh en pe' po oeh, suk a pop pe' to vih pa epep pe Sosoenën.

⁶ Ahikta te' se he' vaeö e Sosoenën pa ö ne' to hikta te' me non o vaman. A te' to nö non manuh pe Sosoenën, e' se te' me non o vaman, pan e Sosoenën to te' e non, ke' se tapui en po te' varih to vaiu ne poë.

⁷ E Noa' to vaman voh non a soe pe Sosoenën to soe non pan, a unat se mirö' o oeh. Ivëhpëhkëk, a unat to me' avoe' voh e non pa tavus, ke Noa' tēnan a soe pe Sosoenën, pare' nok en po parö' apuh, ne e' me ra kēn tom sinan pe' se hop kō te' ne, ko nat ne kon vahat. Manih po vaman pe', e' to vataare a ma taate' hat pa napan. Ivëh, ke Sosoenën poka' en pe' a te' totoopin.

⁸ E Abraham to vaman voh non e Sosenen, pare' pēnton a soe pe', pare' kēh en pa muhin koman pe', pare' hikta nat non e' nōnō non nih. A muhin pamēh ne Sosenen to soe vaman voh a ö ne' se he' poan.

⁹ E Abraham to vaman voh non pan, e Sosenen se he' poan a muhin koman pe', ivēh, ke' te' vavoh non manih pa te' va pa meh muhin manih pa muhin ne' to te' non. E Abraham, ke Aēsak, ke Jekop, to te' voh ne pa ma iuun te'te' vah. Ke Aēsak, me e Jekop to nat e ne pan, ee se kon va'peh me e Abraham a muhin vēh ne Sosenen to soe vaman voh.

¹⁰ Ivēh, ke Abraham to anoeh voh e non o poen ne Sosenen se eok a vōön eh vēh se te' tamooan non.

¹¹ E Sara' me to vaman voh non pa ö ne' se han koa' en, ivēhkēk, e'e' pen e voe pe' Abraham to manot ee, me e Sara' to vavihi, ivēh, kee hikta onöt ne a vatvus ta koa'. E Sara' to vaman voh e non pe Sosenen se suk en pa soe vaman pe', ko he' en pee ta koa'.

¹² E Abraham to manot ro voh en, ivēhkēk, e' to vasipun en pa napan to te' peo va i ne manih po vesun varuh akis me manih po kōsan va sinten tahi', no a hikta te' to onöt non a ēh.

¹³ A ma te' varih, e Abraham, me Aēsak, me Jekop, to vaman voh ne, pare mēt ee. Ee to hikta ep in a ma tah ne Sosenen to soe vaman ke voh raoe. Ee to me' voh e ne pa vaneah a ma tah poē varih. Ivēh, kee nat e ne pan, ee a nap aun.

¹⁴ A napan to sosoe va ne nēn to nat e ne pee to vavaiu ne ta te' muhin se vaneah ne.

¹⁵ E'e to hikta koman hah ne a muhin vöh, nee to käh voh ma'. Ee se keh koman ne, e'e se hah ee pa muhin pamëh.

¹⁶ Ivëhpëhkëk, ee to anoeh voh ne a vöön vih oah pee ipamëh, ivöh pa vöön va kin. Ivëh, ke Sosenën hikta hara' vapoet non pa ö nee to poka' ne poë e Sosenën pee. Suk e' to vamatop ken pee pa vöön voon pee vöh pa vöön va kin.

¹⁷ E Abraham to vaman voh non, ko he' en pe koa' pe' Aësak vamanih pa vöna' nee se ës ke na e Sosenën. Pa ö ne Sosenën to punö' poan. E Abraham voh, ivëh ne Sosenën to he' voh a soe vaman pe'. Ivëh, ke Abraham vamatop voh en pa he' a pah koa' ro pe', vamanih pa vöna' ne' to ës ke na e Sosenën.

¹⁸ E Sosenën to soe vovoh voh ken pe Abraham, “E Aësak se vasipun in a ma napan.”

¹⁹ E Abraham to vaman non pan, e Sosenën se vato' hah e Aësak, pa ö ne' se keh ip vamët voh poan, vamanih po he' ne' to ës ke na e Sosenën. Ivëhkëk, e Abraham to kon hah en pe Aësak to hikta mët.

²⁰ E Aësak to vaman voh non e Sosenën. Ivëh, ke' he' voh en pa tapui pe' manih pe Jekop, pen Iso'. A tapui pamëh nee se kon amot a ma tah vihvih.

²¹ E Jekop to vaman voh non e Sosenën, ivëh, ke' he' en pa tapui pe' manih pa poa koa' oete' pe Jeosëp, vamomoaan in a mët pe'. E' he toon hah a non po toknon, pare' hinhin non e Sosenën se tapui a poa koa' pe Jeosëp.

²² E Jeosëp to vaman voh non e Sosenën pa ö ne' to vavaato suk non a nö pa napan va Israël se tavus

këh a muhin va Isip. E' to soe voh a soe pamëh pa ö ne' to vatët non pa mët, me o soe vanat va pa ö nee se te' a ma soa' pe' pa ö nee se tavus këh a muhin va Isip.

²³ E taman me sinan e Mosës to vaman voh ne e Sosenën, pare hikta nanaöp ne a soe kakis pa te' sunön va Isip. A soe kakis pamëh to soe non pan, a napan va Israël se ip vamët a ma koa' oete' pee. Ee to ep voh e koa' pee to matan vavih. Ivëh, kee koaan e Mosës pa kukön sivö, suk ee to vaman ne pan, e Sosenën se vate' poan pa va'aus a napan va Israël.

²⁴ E Mosës to vaman voh non e Sosenën pa ö ne' to apuh ma'. Pare' hikta iu voh non a ö ne semon a te' sunön va Isip se vasinan avoe' i non poan. Ivëh, ke' koe en pa kon a tasun pa te' sunön va Isip.

²⁵ Ivëhpëhkëk, e Mosës to vamatop e non pa kon kamis va'peh me ra napan pe Sosenën, varih a napan va Israël. Pare' rës e non pa he' tonun e Sosenën pa kon vaeö pa tëëm kökööt, vamanih pa ö no napan va Isip to nonok va ne.

²⁶ E Mosës to vamatop voh e non pa kon poet va'peh me ra napan pe Mesaëa'.* E' to rës voh e non pa öt a moni', me a ma moeh tah vihvih va pa kaman va Isip. Suk ataeah, e' to ep e non na po voen apuh oah ne' se kon amot ne Sosenën se he' poan.

²⁷ E Mosës to vaman voh non e Sosenën, ivëh, ke' këh tavus a muhin va Isip, pare' hikta nanaöp

* **11:26:** E Mesaëa', e Kristo to me' avoe' voh e non pa koa' po poen ne Mosës to te' non, ivëhkëk, e Mosës to vaman voh non pan, e Mesaëa' se koa' tane' ma' pa napan va Israël. Ivëh, ke' iu te' va'peh me non a napan va Israël, ko kon punis va'peh me raoe.

non o heve pa te' sunön va Isip. Ea to hikta onöt no a ep in e Sosoenën pa mataara, ivëhkëk, e Mosës to te' me non a taate' vaman, vamanih pa te' to ep in e Sosoenën, ko vaman pe' manih pe Sosoenën to eh.

²⁸ E Mosës to vaman voh non pan, e Sosoenën se kon ke a ma koa' oete' vamomooan va Israël, kee hikta se mët ne, ivëh, ke' vavaasis a ma napan va Israël pan, ee se ip a sipsip vamanih pa ö ne Sosoenën to soe, pare kon ö era' pe' ko rëp manih pa ma hopa'. Suk a ankerö' se ep in ö era' ko hikta se ip vamët non a ma koa' oete' vamomooan pee.

²⁹ A napan va Israël to vaman voh ne pan, e Sosoenën se me tavus këh raoe a muhin va Isip, ivëh, ka naman vëh nee to popoka' ne a Naman Erera' nö vakëh, ka napan suk ee po oeh. Ka nap vëvënsun va Isip kehkeh vatet ne raoe, ka naman takök hah ma' ko kopös en pee, kee mëtmët ee.

³⁰ A napan va Israël to vaman voh ne pan, e Sosoenën se va'aus raoe, ivëh, kee vavatvi ne a kiikin vös va Jeriko' po tönim me ro pöök poen. Ke Sosoenën va'aus raoe ka kiikin vös pamëh takök, ko taru vahik en.

³¹ E Rehap a köövo te'te'vaasi' moaan voh to vaman non pan, e Sosoenën se kon ke en pe' ke' hikta se mët non, ivëh, ke Rehap va'aus vavih a poa te' to nö pa epep aven pa vöön va Jeriko'. Ke Sosoenën va'aus en pe', ke' hikta mët va'peh me ra napan varih Jeriko' to vatösoe ne e Sosoenën.

³² Eö' to hikta te' me no' ta tëëm, nö' se vahutët suk pet no' na a ma te' varih to vaman voh ne e Sosoenën, e Gideon, me Barak, me Samson, me Jëpta', me Devit, me Samuël, me ra ma meh te' vanënën soe.

³³ E'e to vaman voh ne ko vavatet ne e Sosenen, pare kon a ma tah ne Sosenen to soe vaman voh, pa ö nee to vapus pip vaeh suk a napan pee Israël. Pare onoah a ma napan va pa meh muhin to vakihat me ne e Sosenen. Pare hinhin ne e Sosenen se matop non raoe, pare' sunpip ko ötöön a rivoero laëon, kee hikta onöt ne a mirö' ko ëen ta ma paeh pee.

³⁴ E'e to vaman voh ne pan, e Sosenen se va'aus raoe, ivëh, ka sura' hikta ës i raoe, ka ma meh tavus këh ee po te' se ip raoe po rapis rë. E'e ro sunë, ivëhkëk, ee to kon eh hah ee, pare te' eh oah rakah e ne koman a ma vapus me ro upöm te'.

³⁵ O köövo to vaman voh ne pan, e Sosenen se va'aus raoe, ivëh, ke Sosenen vato' hah en pa ma paeh te' pee to mët voh ee. Ivëhkëk, a ma meoh upöm te' to mët, suk o te' to rës voh ne a taate' vaman po te' poë varih, pare nohnoh voh raoe, ko ip vamët ee pee. Ivëh, ka ma te' poë varih to vaman ne se sun hah, ko te' ne po to'to' vih manuh pa vöön va kin. Suk ee to koe ee pa rusin këh o kamis no te' hat to nonok ne manih pee.

³⁶ A ma meh te' va po vaman no te' hat to rëp vavakmis voh raoe po uris, ka ma meh nee to nohnoh po uris eh, ko vaho' raoe manuh pa iuun nohnoh, pare kö raoe.

³⁷ O te' hat to tösvös voh a ma meh te' va po vaman, ko so' kukurus a ma meh pee, ko moes kukurus ee pa ma meh po rapis rë. O te' va po vaman to arus voh, pare ohop voh ne a ma kap sipsip me a ma kap meeme'. Ka nap hat nonok vahat voh ne raoe.

³⁸ O te' va po vaman varih, to vih oah e ne po

te' to nonok vahat ne raoe. Ko te' va po vaman to nönö vah voh kov e ne, vamanih po te' aun koman a moeh totope upin, pare te' voh ne koman o oeh me manih pa ma vëvë.

³⁹ A ma te' varih to vaman voh ne. Ivëh, ke Sosenën poka' raoe pan, ee a ma te' viih vörep. Ivëhkëk ee to me' avoe' e ne pa kon a ma tah viih ne Sosenën to soe vaman voh.

⁴⁰ Suk ataeah, e Sosenën to te' me voh non o meoh kokoman to te' viih oah e non, to onöt non a ö na se kon a ma tah vihvih to se va'aus va'peh raoe. Suk ee to hikta onöt ne a kon vovoh këh voh a ra.

12

Ea Se Nat No E Ieesu', Para Vaman No Eah

¹ Ea to te' me no pa ma te' va po vaman varih nön' to vavahutët suk varu' no'. Ee to mët voh ee, ivëhkëk, ee to ut e ne pa pop pea.* Ivëh, ka se öt vakis o vaman, ka se tavus manuh pe Sosenën. Ea se öt vakis o vaman pea vamanih po te' to vaveo ne po vavaveo, vamanih pa te' are. Ea se koe a ma taate' hat tome' rëhtöön a ra pa tavus manuh pe Sosenën.

² Ea se kute' no na manuh pe Ieesu', pe e' a pusun in o vaman, pare' vapuh non o vaman pea. E Ieesu' to han non pa kuruse, suk e' to nat e non po vaeö apuh ne' se kon. Ivëh, ke' hikta te' poet voh non pa han pa kuruse. Kuru ne' to iho' non pa papmatö pa ö iho' pa te' sunön vëh e Sosenën,

* **12:1:** [Ee to mët voh ee, ivëhkëk, ee to ut e ne pa pop pea.] A ma te' varih to mët, pare ut e ne a pop pea, ee a ma te' viih, ka se koe a naöp raoe.

ivëh, ne' to te' suk me non a tasun pa matop a ma moeh tah kurus.

³ Ivëh, kõm se koman hah nem a ö ne Ieesu' to sun vakis voh e non, pa ö no nap hat to mirö' poë. Ko vaman peöm se te' kikis non manih pe', paröm nat nem koe rom.

⁴ Eöm to te'te' nem a ma punis apuh, suk a ma meh peöm to punö' ne pa rëh a neöm manih pa ma taate' hat vamoan. Ivëhkëk, eöm to me' avoe' e nem pa öök manih pa ö nee se ip vamët a neöm.

⁵ Eöm to anoe pö' voh em pa ma soe va pa vaeh o vaman ne Sosenën to soe voh ka neöm a ma koa' pe', pare' soe pan,

“Koa' peö',

eën se pënton soe pa ö ne Sosenën se rëp vavaasis a oah.

Parën nat nom hara' vöknah pa ö ne Sosenën to kehkeh vatotoopin a nom oah.

⁶ Suk ataeah, e Sosenën to vavaasis non sih a ma te' ne' to iu non.

Pare' vakmis non a ma koa' pe', suk e' to iu non pan,

ee se te' ne pa taate' totoopin.” *Prov 3:11-12*

⁷ Ivëh, ka se te' ee pa ma punis to te' va ne manih po kamis no a ma tamaara to he' a ra, suk ea to nat e no pa ma tamaara to iu va'aus a rora a ma koa' pee. Suk ee to iu a rora se te' vavih no pa taate' totoopin.

⁸ E tamömah se keh hikta vakmis a nom oah, eën to hikta te' nom pan, eën e koa' rakah pe'. Ivëh, kën se te' nom e koa' hikten taman.

⁹ Manih pa ma tamaara, e'e to vakmis a rora ka se ta no raoe. Ivëh, ka se te' no paan e Tamaara vöh

pa vöön va kin, po poen ne' to vakmis a ra, marën a va'aus a ra, pa ö ne' se he' a ra o to'to' tamoaan.

¹⁰ A ma tamaara to vavakmis a rora sih pa ö nee to ep ne to te' vih non. Ivëhkëk, e Sosenën to vakmis a rora pa ö ne' se va'aus a rora, ka se kon a taate' vivihan koman pe'.

¹¹ A ma tamaara se vakmis a ra, suk a tah na to nok vahat. E'e to vatamak ee pea, ka hikta se te' vaeö no. Ivëhkëk, amot ea varih to kon kamis, se kon ee po kokoman tö me a taate' totoopin.

¹² Ivëh, köm se sun vakis ko te' kakis nem po vaman peöm, paröm vaeh nem o vaman pa ma meh te'.

¹³ Eöm se te' vatotoopin nem pa ma taate' peöm. Ivëh, ka ma meh te' to hikta vaman vakis ne, se vatet a taate' totoopin pamëh, pare vaman vakis hah e Sosenën.

¹⁴ Eöm se te' vakamö' me nem ro upöm te', paröm punö' pa te' vavivihan. Suk ataeah, eöm hikta se ep amot nem e Sosenën pa ö nöm se hikta te' me nem a taate' vivihan.

¹⁵ Eöm se matop nem, tome' a ma paeh peöm këh hah o ururuan pe Sosenën. Ke' eöm toma' tavus vamanih po meon hat to pu ko mirö' a ma meh tah.†

† **12:15:** A paeh te' to këh hah o ururuan pe Sosenën, pare' tavus vamanih po meon hat to pu ko mirö' a ma meh tah. A pusun in a soe pamëh to soe va non manih pan, o meon hat vëh, e' a te' to këh hah o ururuan pe Sosenën. O meon hat to pu ma', e' a te' pamëh to te' va'peh me non o te' va po vaman. O meon hat to mirö' a ma meh tah. E' a te' pamëh to nok a ma taate' hat, ka ma meh te' ep suk, pare vatet a taate' hat pamëh. Ivëh, ke'e kurus to këh tavus ee po ururuan pe Sosenën.

¹⁶ Eöm se matop nem, ta peah va peöm tome' tavus a te' rëhrëh, me a meh tome' hikta vaman non e Sosenën vamanih pe Iso'. E'e' to panih a tasun ne' se kon tane' ma' pe tamaneah. E Iso' to he' a tasun pe' pa ö ne' to soe vaonöt vamanih pan, e kea sone' pe' Jekop se kon a tasun pe tamëëre, pa ö ne Jekop se keh he' poan a taëën.

¹⁷ Vasuksuk ea to nat e no pe Iso' to iu kon voh non a tasun manih pe tamëëre. Ivëhkëk, e' to hikta onöt non a panih o kokoman pe tamëëre, ivëhpëhkëk, e' to okook voh non pan, e' se kon hah a tasun pe'.

¹⁸ Ivëh, köm hikta nö vavoh ma' manih pa ö no napan va Israël to nö vavoh ma', pare tavus e Sosenën manih pa tope vëh na to onöt no a ep, a ëhnan a tope pamëh a tope Saënaë'. A tope pamëh no o sura' apuh to te' voh non, me a popoen apuh to vatvus o naöp, me a ivat apuh to tavus.

¹⁹ Ka napan va Israël to tēnan a tah to tanih va non manih pa suvin me o vaato pe Sosenën, to tatane' no ma' tope Saënaë'. Pare hin vakis e pe Mosës pa ö se nat ne tēnan hah ta meh soe pe Sosenën.

²⁰ Suk ataeah, ee to nanaöp voh ne a soe vëh nee to tēnan,
 “Ahikta pah tah se vatiru' manuh pa tope, ta pah tah se keh vatiru', a napan se tösvös ee pe'.”

Eks 19:12-13

²¹ E Mosës to naöp voh e non pa tah ne' to ep, pare' soe pan,

“Eö' to naöp vörep rakah e no', ko rikrik e no'.” *Lo 9:19*

²² Ivëhkëk, eöm to tavus voh em pa tope vëh na to hikta onöt no a ep, a ëhnan a tope pamëh, a

Saëon, e' a vöön apuh pe Sosoenën to'to' tamooan, no ankerö' peo pe' to te' ne pa Jerusaleëm voon. O ankerö' varih na to hikta onöt no a ëh raoe, ee to vaeö tamooan ke ne e Sosoenën.

²³ Eöm to nö em ma' po vakum vaeö po koa' vamomooan[‡] no a ëhnëëre to kiun non manuh pa vöön va kin. Eöm to nö em ma' pe Sosoenën, a te' to kiiki non a ma apen a napan kurus. Eöm to tavus em manuh pa apeera nap vih, ne Sosoenën to poka' non raoe a nap totoopin.

²⁴ Eöm to nö em ma' manih pe Ieesu', a te' to vatotoopin o vatompoan voon. E' to vavoon a ra po era' to soe vanat a rora a ma tah to te' vih oah e ne po era' pe Ebel. Suk o era' pe Ieesu' na hikta se piun va no manih po era' pe Ebel. §

²⁵ Eöm se matop nem, ko koe a pënton varo e Sosoenën vëh to vavaato non. A ken sipuineöm to pënton varo voh ee pa soe pe Mosës manih po oeh, pare taum ee pa ma punis. Ivëh, ke ea me se taum o punis apuh oah, pa ö na to pënton varo a soe pe Sosoenën, to vavaato tane' e non ma' pa vöön va kin.

²⁶ A soe pe' to kö en po oeh, ivëhkëk, e' to soe vamanih pan,

“Eö' hikta se kö varoe no' o oeh, a akis me.” *Hag*
2:6,21

[‡] **12:23:** [... po koa' vamomooan ...] E koa' oete' vamomooan manih po Jiu' to kon a tasun apuh oah manih pa koman a kën taman, pare' kokon non a ma tah vihvih oah. A ma koa' kurus pe Sosoenën to te' va ne nën. § **12:24:** [... o era' pe Ieesu' na se hikta piun vamanih po era' pe Ebel.] A piun po era' pe Ebel to te' va non manih pa ö ne Sosoenën to soe pan, e Keen se taum amot a punis, suk e' to ip vamët e kea pe' Ebel.

²⁷ A soe to soe ka rora pan, a ma moeh tah varih po oeh ne Sosenen to nok voh se variu ee, ke Sosenen se panih en pee. Ivèhkèk, a ma tah varih to hikta onöt ne a variu, pare hikta se panih ne.

²⁸ Ea se te' vivihan no ko vavatet no e Sosenen, suk ataeah, ea to te' no paan o matop vih pe'. Ivèh, ko matop vih vèh hikta se variu non, pare' te' tamooan e non. Ea se hinhin no e Sosenen, ko he' vaeö no eah, ko vasunön eah, para ta no eah.

²⁹ Ea se vaman no a ma soe man pe Sosenen, suk e'e' to vakmis non o te' to vatösoe ne. A vakmis pe' to te' va non manih po sura' to onöt non a ès vahik a ma tah kurus.

13

E Sosenen E Tamaara

¹ Eöm se iu nem a ma meh upöm te' vamanih pa ma kea peöm.

² A ma paeh sipuura to vaoe voh ne a ma te' va pa ma meh muhin pa ma iuun pee, ko hikta nat va i ne raoe manih pan, e'e o ankerö'. Ivèh, köm se vaoe nem a ma te' va pa ma meh muhin manih pa ma koman iuun peöm.

³ Eöm se nat nem o te' varih to te' ne pa iuun nohnoh, vamanih peöm to te' va'peh me e nem pee. Eöm se nat nem o te' varih no o vakihat pee to nok vahat voh raoe, vamanih peöm to kamis va'peh me e nem pee.

⁴ O vaen peöm se te' totoopin non, ke voe me köövo se matop vavih ne o vaen pee pon. E Sosenen se kiiki a ma taate' hat po te' varih to te' ne pa taate' rèhrèh.

⁵ Eöm se koe a iu vörep a moni', paröm te' vaeö me nem a ma tah nöm to öt nem. Suk e Sosenen to soe pan,

“Eö' hikta se käh rakah no' oah, ko anoe a oah.” *Lo*

31:6

⁶ Ea to onöt e no pa vaman a soe to te' non koman o Puk Vapenpen to soe non pan,

“E Sunön to va'aus a non neo',

iväh, kö' hikta se naöp no' ta tah no a te' se nok manih peö'.” *Sng 118:6*

⁷ Eöm se nat nem a ö no a ma te' to vovoh voh ka no neöm, to vavaasis voh ne a soe pe Sosenen, paröm koman nem a ö nee to te' vavih vavoh nee. Ko suk a ö nee to vaman vavoh ne.

⁸ E Ieesu' Kristo to vatoe e non nopoen, kuru, me e' se te' tamoaan e non.

⁹ Eöm se nat nem pënton a ma meh vavaasis to te' ke ne. E' to viih rakah pa ma komaara se kon tane' varoe o kikis manih po ururuan pe Sosenen. A ma komaara hikta se vatet non a taate' va pa ään a taään supon, suk a taate' pamäh toma' räh ke käh a ra o vaman, ka hikta onöt no a kon va'aus nän.

¹⁰ A napan varih o te' äsäs he' po Jiu' to vavatet avoe' e ne po vatampoan vamoan, marän a vasunön e Sosenen, to hikta onöt ne a kon o va'aus ne Ieesu' to he' a ra pa mät pe'.*

¹¹ A te' Susun po Te' Äsäs He' to te'te' ho voh non o era' va pa vöna' manuh pa ö vasio' to vëknöm ro

* **13:10:** [... to hikta onöt ne a kon o va'aus ne Ieesu' to he' a ra pa mät pe'.] A napan to iu vatet varoe ne o vatampoan vamoan pa tavus o te' totoopin pa matan e Sosenen, ee me to hikta onöt ne a kon o va'aus manih pe Kristo. Suk ee to koe ee po he' vöh, pa ö ne Kristo to mät pa kon hah käh raoe a hat pee.

non a ma hat pa napan to se hik. Ivëhkëk, a sionin o vöna' nee to ësës voh ne manuh sinten a vöön.

¹² Ke' te' akuk va kov e non pa ö ne Ieesu' to mët voh en ma' sinten a vöön, pa vahik a ma hat pa napan po era' pe'.†

¹³ Ivëh, ka se nö ee po vakum pe Ieesu', ko te' va'peh me no rae, ko poet va'peh me eah pa ö ne' to mët vavoh.‡

¹⁴ Ee se koe a vatet o vatompoan vamoan ko vaman varoe no e Ieesu', suk ataeah, manih po oeh e' hikta te' non pan, e' a ö te'te' tamooan pea. Ivëh, ka se ep amot a vöön te'te' tamooan voh a vöön va kin.

¹⁵ Ivëh, ka se he' vaeö koe no na e Sosoenën manih pe Ieesu' pa ma väähëh, na to väähëh no na manuh pe Sosoenën.

¹⁶ Ea se koe a anoe a nok a taate' vih, me a taate' ururuan, me a taate' vava'aus a ma meh te' pea, suk a ma taate' va'aus, me a ma taate' vih poë varih to he' vaeö ne e Sosoenën.

¹⁷ Eöm se vatet nem a ma te' to susun ka no neöm, paröm tēnan nem rae. Suk ee to matop a no neöm, ko to'to' peöm te' totoopin non. Amot ee se he' e Sosoenën o vahutët va pa ma va'aus nee to nok, köm se keh tēnan nem rae, ee se te' me ne o vaeö,

† **13:12:** [... pa vahik a ma hat pa napan po era' pe'.] O era' po vöna', e' o vëknöm varoe va pa ö no a ma taate' hat se hik. Ivëhkëk, o era' vëh pe Kristo to te' oah voh e non po vëknöm, o era' pe' to vahik rakah voh en pa ma hat pa napan. ‡ **13:13:** Po poen ne Ieesu' to mët sinten a vöön Jerusalēm, a ma napan to vöknah a ëhnaneah, suk ee to koman ne pan, a te' no a nap vëvënsun to ip vamët sinten a vöön, to nok a taate' hat. Ivëh, ka se poet va'peh me e Ieesu', suk ea to kon va'aus pa mët pe'.

pare nok vavih a kiu pee. Ee tome' nonok me ne o tamak ko hikta se va'aus a no neöm.

¹⁸ Eöm se hinhin vatëh ka no möm o te' susun peöm, suk a ma kupu pemöm to hara' vavih e ne ko te' maaka e ne, kemöm iu nok tamoaan e nem pa taate' totoopin.

¹⁹ Eö' to hinhin vakis a no' neöm kurus se hinhin nem e Sosoenën, ke' se vanö vëhō' hah ma' neo' manem peöm.

O Hin Va Pa Vih

²⁰ E Sosoenën to vato' hah e Ieesu', ka manih po era' pe', e' to nok o vatompoan voon te'te' tamoaan topniira, me e Sosoenën. Ivëh, ke' te' non a te' Sunön to matop a rora vamanih pa te' mamatop sipsip.

²¹ Ivëh, kö' hinhin suk a no' neöm pan, e Sosoenën a kamō' se he' a neöm a ma tah vihvih nöm to iu nem, marën ö nöm se vatet o iu pe'. Ka manih pe Sosoenën, ea se he' vaeö koe no eah manih pe Ieesu' Kristo. Ke Kristo, na se kë no a ëhnaneah pa ma tamoaan. Oman!

²² Ivëh, kën kea, eö' to hi vakis a neöm pa tēnan, ko te' me nem o kokoman tö, suk a soe vëh nō' to kiun nös se vaeh o vaman peöm, e' hikta te' rē non.

²³ Eö' to iu no' neöm se nat nem pan, e kea pea Timoti' to tavus këh en pa iuun nohnoh. E Timoti' se keh nō vëvëhō' en ma', kemöm po' nō em nös pa ep a neöm.

²⁴ Eöm se he' a soe vavihvih pemöm manih po te' to susun ka ne neöm, me manih pa ma napan pe Sosoenën. A ma kën kea varih pa muhin va Itali' to vanö nös a soe vavihvih pee manih peöm.

²⁵ Eö' to hinhin suk a no' neöm pan, o ururuan
pe Sosoenën se te' va'peh me a non neöm kurus.

SOE A TO'TO'
The New Testament in the Vasui (Tinputz) Language of
Papua New Guinea
Nupela Testamen long tokples Vasui long Niugini

copyright © 2004 Wycliffe Bible Translators, Inc.

Language: Vasui (Tinputz) (Tinputz)

Dialect: Vasui

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-08

PDF generated using Haiola and XeLaTeX on 18 Mar 2025 from source files dated 31 Aug 2023

f779a4b1-4c33-58ed-ae43-2686ceb877fb